

BiH: Anketiranje 60.000 domaćinstava u statističke svrhe



Oko 120 anketara će u naredna 22 dana, počevši od danas, prikupljati podatke o domaćinstvima u Bosni i Hercegovini s ciljem da se provjeri da li je od 2009. godine, kada je urađen prvi Master uzorak, došlo do manjih ili većih promjena na terenu.

Anketari, akreditovanih od statističkih institucija, će u oko 60.000 domaćinstava prikupljati osnovne demografske podatke o broju članova domaćinstava, starosnoj strukturi i njihovim obrazovnim karakteristikama, najavila je Agencija za statistiku BiH.

Osim toga, anketari će provjeravati i broj stambenih objekata na terenu budući da je u proteklih deset godina u nekim područjima izgrađeno jedno ili više naselja što je automatski dovelo do promjene u broju domaćinstava, njihovim karakteristikama i strukturi domaćinstava.

Anketiranje se provodi u okviru projekta ažuriranja statističkog Master okvira uzorka sa krajnjim ciljem da se poveća obim i kvalitet statističkih podataka u Bosni i Hercegovini kao i njihovo dalje usklađivanje sa EU standardima kojeg provodi Agencija za statistiku BiH, u saradnji sa entitetskim zavodima za statistiku.

Ažuriranje će se raditi kvartalno tokom tri godine. Prva četiri kvartala statističke institucije provode u saradnji sa agencijom Prism Research&Consulting iz Sarajeva, nakon toga same nastavljaju sa ovom izuzetno važnom statističkom aktivnosti.

Novina u ovom projektu je i način prikupljanja podataka na terenu. Statističke institucije prvi put rade anketiranje putem posebno kreirane software-ske aplikacije. To znači da će anketari umjesto upitnika na papiru koristiti laptove sa instaliranom aplikacijom pomoću koje će se vršiti unos podataka i dostavljati statističkim institucijama na dnevnoj bazi.

Zbog značaja ovog projekta statističke institucije mole nosioce domaćinstava za aktivnu saradnju u realizaciji ovog važnog istraživanja i garantuju da će, u skladu sa zakonima o statistici i zaštiti ličnih podataka, odgovori na postavljena pitanja biti strogo povjerljivi i da će ispitanici ostati potpuno anonimni, te da će se prikupljeni

podaci koristiti isključivo za statističke svrhe.

60

SHARES

[_ Share on Facebook](#)

[_ Tweet](#)

-

-

[Follow us](#)

[_ Share](#)

[_ Share](#)

[_ Share](#)

[_ Share](#)

[_ Share](#)

Date: 17-09-2019